

TARIKH : 21 OGOS 2025
AKHBAR : BERITA HARIAN
MUKA : 11
SURAT

Bantuan tunai, penurunan OPR tangani tekanan ekonomi semasa

BH Khamis, 21 Ogos 2025

Komentari

11

Bantuan tunai, penurunan OPR tangani tekanan ekonomi semasa



Pensyarah di Pusat Pengajian Pembangunan Ungku Aziz (UACU), Universiti Malaysia

Oleh Dr Cheah Chan Fatt
bhrencana@bh.com.my

Bantuan tunai RM100 secara one-off kepada semua warganegara berusia 18 tahun ke atas melalui MyKad disertai penurunan kadar faedah sebanyak 25 mata asas oleh Bank Negara Malaysia (BNM), membentuk satu pendekatan dasar saling melengkapi dalam menangani tekanan ekonomi semasa.

Kedua-dua langkah ini bukan sahaja bersifat responsif terhadap cabaran makroekonomi, tetapi memberi impak langsung kepada kesejahteraan rakyat, khususnya golongan B40 dan M40 yang menetap di bandar.

Golongan berpendapatan rendah dan sederhana di bandar menghadapi tekanan kos sara hidup lebih tinggi berbanding di luar bandar. Kenaikan harga barangan asas dan perkhidmatan, terutama selepas peluasan kategori Cukai Barang dan Perkhidmatan (SST), menyebabkan kuasa beli mereka merosot secara ketara.

Dalam konteks ini, bantuan RM100 dikreditkan terus ke MyKad untuk pembelian barangan asas seperti beras, ubat-ubatan, produk kebersihan dan alat tulis, menjadi satu bentuk sokongan segera sangat diperlukan.

Walaupun jumlahnya kelihatan kecil, impaknya

besar apabila digabungkan dengan penjimatan lain seperti subsidi bersasar dan penangguhan tol.

Bagi keluarga bandar terdiri daripada empat orang dewasa, jumlah bantuan boleh mencecah RM400, cukup untuk menampung keperluan dapur selama beberapa minggu.

Pada masa sama, penurunan Kadar Dasar Semalaman (OPR) oleh BNM kepada 2.75 peratus menjadikan kos pinjaman lebih rendah, sekali gus memberi ruang kepada isi rumah dan perniagaan kecil untuk bernafas.

Jimat ratusan ringgit sebulan

Bagi golongan M40 yang mungkin mempunyai komitmen pinjaman rumah, kereta atau pendidikan, pengurangan kadar faedah ini boleh menjimatkan ratusan ringgit sebulan.

Ia juga membuka peluang kepada perusahaan mikro dan perusahaan kecil dan sederhana (PKS) untuk mendapatkan pembiayaan tambahan bagi memperluas operasi atau menambah stok, terutama menjelang musim perayaan dan cuti sekolah.

Kombinasi bantuan tunai dan pelonggaran dasar monetari ini turut menyokong pemulihan sektor runcit serta perdagangan domestik. Dengan lebih 22 juta individu dewasa layak menerima bantuan RM100, suntikan fiskal mencecah lebih RM2 bilion ke dalam ekonomi.

Ini dijangka merangsang semula aktiviti perniagaan di pasar raya seperti Mydin, Lotus's dan

99Speedmart, serta kedai runcit komuniti terbabit dalam program MyKasih.

Peningkatan permintaan terhadap barangan asas akan memberi kesan limpahan kepada rantaian bekalan, logistik dan pengangkutan, sekali gus mengaktifkan semula ekosistem perdagangan tempatan.

Dari sudut dasar, langkah ini menunjukkan komitmen kerajaan dalam melaksanakan pendekatan fiskal dan monetari bersifat inklusif dan bersasar. Ia bukan sahaja membantu rakyat menghadapi tekanan ekonomi jangka pendek, tetapi memperkukuh daya tahan ekonomi negara dalam menghadapi ketidakpastian global.

Bantuan tunai melalui MyKad dikawal secara digital juga mengurangkan risiko ketirisan dan penyalahgunaan, menjadikannya lebih telus dan berkesan.

Secara keseluruhan, gabungan bantuan tunai RM100 dan penurunan kadar faedah BNM adalah strategi dua hala menyasarkan kesejahteraan rakyat serta kestabilan ekonomi.

Ia memberi kelegaan kepada golongan B40 dan M40 bandar yang paling terkesan, sambil menyokong pemulihan ekonomi negara secara menyeluruh.

Semua artikel penulis tamu adalah pendapat peribadi, bukan pendirian rasmi BH